

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI KHAMIS, 19 MAC 2015, PUKUL 10.00 PAGI**

**Bil. 8**

---

**PERTANYAAN-PERTANYAAN BAGI JAWAB LISAN**

1. PR-1331-L65764  
**Datuk Bung Moktar bin Radin [ Kinabatangan ]** minta **MENTERI KOMUNIKASI DAN MULTIMEDIA** menyatakan tentang apakah rancangan Kementerian dalam mengawal penggunaan media sosial agar dapat membendung salah laku serta sejauh manakah kesungguhan pihak Kementerian dalam menghukum pesalah laku media sosial ini agar gejala fitnah dan hasutan dapat dibendung.
2. PR-1331-L65621  
**Laksamana Pertama Mohamad Imran bin Abd Hamid (B) [ Lumut ]** minta **MENTERI KERJA RAYA** menyatakan bilakah had laju Kebangsaan kenderaan di lebuh raya boleh ditingkatkan dari 110km/jam kepada 150km/jam memandangkan kualiti dan standard kenderaan yang digunakan sekarang berkualiti dan berkelajuan tinggi. Adalah dicadangkan lorong kiri kelajuan maksima 110km/jam, lorong tengah kelajuan maksima 110-130km/jam dan lorong kanan kelajuan 130-150km/jam.
3. PR-1331-L65553  
**Dato' Sri Haji Abdul Azeez bin Abdul Rahim [ Baling ]** minta **MENTERI PERTANIAN DAN INDUSTRI ASAS TANI** menyatakan apakah langkah-langkah Kementerian dalam membantu petani-petani di kawasan luar bandar meningkatkan pengeluaran eksport dan mengurangkan hasil pertanian import daripada negara luar.
4. PR-1331-L66359  
**Tuan Lim Kit Siang [ Gelang Patah ]** minta **PERDANA MENTERI** menyatakan jumlah wang yang diperuntukkan dan diedarkan untuk kerja-kerja pemulihan Negeri Kelantan, Terengganu dan Pahang pasca-banjir akhir tahun 2014 mengikut negeri, dan peratusan peruntukan yang diagihkan untuk kampung-kampung orang asli khususnya di Kelantan.

5. PR-1331-L65710  
**Datuk William @ Nyallau anak Badak [ Lubok Antu ]** minta **MENTERI KEMAJUAN LUAR BANDAR DAN WILAYAH** menyatakan apa tindakan Kementerian untuk mengatasi kegagalan pelaksanaan bekalan elektrik ke Titok, Bunuk Beging, Senibong, Tebarung Merio, Bara, Bukit Tungku di kawasan P.203 Lubok Antu yang begitu lama tidak disiapkan.
6. PR-1331-L66587  
**Tuan Zairil Khir Johari [ Bukit Bendera ]** minta **MENTERI SUMBER ASLI DAN ALAM SEKITAR** menyatakan jumlah gading yang dirampas, bilangan orang yang ditangkap dan didakwa kerana kesalahan menjual gading, serta sama ada gading tersebut disimpan atau dimusnahkan.
7. PR-1331-L67049  
**Dr. Mansor bin Abd Rahman [ Sik ]** minta **MENTERI PERDAGANGAN ANTARABANGSA DAN INDUSTRI** menyatakan apakah kerjasama yang boleh dicapai daripada MoU yang telah ditandatangani antara Proton dan sebuah syarikat kereta yang disaksikan oleh YAB Perdana Menteri dan Presiden Indonesia pada 6 Feb 2015 baru-baru ini.
8. PR-1331-L65976  
**Puan Siti Zailah binti Mohd Yusoff [ Rantau Panjang ]** minta **PERDANA MENTERI** menyatakan apakah langkah-langkah segera untuk mengatasi masalah pemulihan ekonomi terutama yang melibatkan mangsa-mangsa banjir di Kelantan.
9. PR-1331-L66047  
**Datuk Ahmad Jazlan bin Yaakub [ Machang ]** minta **MENTERI PENDIDIKAN** menyatakan apakah bentuk kerjasama yang dicapai hasil daripada lawatan YAB Menteri Pendidikan ke Negara China pada penghujung tahun lepas di dalam usaha mengantarabangsakan Bahasa Melayu dan menjadikan Bahasa Mandarin sebagai bahasa ketiga di negara ini.
10. PR-1331-L65815  
**Tuan Wan Hasan bin Mohd Ramli [ Dungun ]** minta **MENTERI KERJA RAYA** menyatakan langkah dan jaminan kejadian banjir jajaran Lebuhraya Pantai Timur (LPT) di Temerloh dan Bukit Besi tidak berulang.
11. PR-1331-L65646  
**Dato' Henry Sum Agong [ Lawas ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan proses pemilihan bagi membekalkan barangan bersubsidi khususnya pembekal tempatan.
12. PR-1331-L65924  
**Tuan Tan Kok Wai [ Cheras ]** minta **MENTERI KESIHATAN** menyatakan apakah jenis ubat, peralatan perubatan dan perkhidmatan yang tertakluk kepada cukai GST. Bagaimana cara Kementerian memastikan bahawa pelaksanaan GST tidak akan mengakibatkan kenaikan caj yang tinggi dalam hospital-hospital swasta dan mengapakah ubat tradisional Cina dikenakan cukai GST.

13. PR-1331-L66765  
**Tuan Che Mohamad Zulkifly bin Jusoh [ Setiu ]** minta **MENTERI PENDIDIKAN** menyatakan langkah Kementerian dalam mengatasi beban kewangan yang ditanggung oleh ibu bapa di sesetengah sekolah yang mengenakan pelbagai caj bayaran kemudahan dan peralatan sekolah yang terpaksa ditambah mengikut kehendak sekolah.
14. PR-1331-L65731  
**Tuan Ahmad Baihaki bin Atiqullah [ Kubang Kerian ]** minta **MENTERI PENDIDIKAN** menyatakan apakah ukuran dan nilai yang digunakan oleh pihak Kementerian untuk memastikan sesebuah sekolah itu dapat digunakan khususnya selepas banjir besar yang melanda negeri Kelantan baru-baru ini, dan berapakah jumlah sebenar sekolah yang ditangguhkan sesi persekolahan pasca banjir.
15. PR-1331-L66651  
**Tan Sri Datuk Seri Panglima Joseph Pairin Kitingan [ Keningau ]** minta **MENTERI SUMBER ASLI DAN ALAM SEKITAR** menyatakan kejadian banjir yang sering berlaku di daerah Keningau akibat sungai yang cetek dan sempit, apakah ada cadangan untuk mendalam dan membesarkan sungai-sungai di kawasan Parlimen Keningau.
16. PR-1331-L65781  
**Tuan Wilson Ugak Kumbong [ Hulu Rajang ]** minta **MENTERI KESIHATAN** menyatakan:-
- (a) adakah Kementerian akan mengkaji semula cadangan untuk membesarkan Hospital Kapit bagi menampung kesesakan; dan
  - (b) meneliti aduan orang awam berkenaan dengan waktu menunggu sebelum mendapatkan rawatan yang lama terutama sekali selepas waktu bekerja.
17. PR-1331-L66272  
**Tuan Su Keong Siong [ Ipoh Timor ]** minta **MENTERI PELANCONGAN DAN KEBUDAYAAN** menyatakan langkah-langkah yang diambil untuk mempromosi dan memelihara Tapak Warisan Dunia UNESCO Lembah Lenggong. Adakah pengambilan tanah dan pewartaan tapak warisan tersebut seluas 1,814 hektar telah dijalankan oleh Kerajaan.
18. PR-1331-L65451  
**Datuk Dr. Haji Abd. Latiff bin Haji Ahmad [ Mersing ]** minta **MENTERI KEMAJUAN LUAR BANDAR DAN WILAYAH** menyatakan adakah Skim Pembiayaan Ekonomi Desa (SPED) yang ditawarkan ini mendapat sambutan di kalangan pengusaha di luar bandar. Sejak lima tahun lalu, berapa ramai yang telah mendapat kemudahan ini dan berapa ramai yang berjaya sebagai pengusaha Bumiputera luar bandar yang berpotensi dan berdaya maju.

19. PR-1331-L67106  
**Tuan Manivanan a/l Gowindasamy [ Kapar ]** minta **MENTERI KEWANGAN** menyatakan:-
- (a) jumlah cukai yang dibayar oleh 25 terkaya di Malaysia menurut senarai warga Malaysia terkaya Forbes tahun 2014; dan
  - (b) butiran syarikat-syarikat berserta nama pengarah dan seumpamanya yang diberikan kontrak perkhidmatan berkaitan dengan pelaksanaan cukai GST.
20. PR-1331-L65697  
**Datuk Seri Noh bin Haji Omar [ Tanjong Karang ]** minta **MENTERI KESIHATAN** menyatakan tindakan Kementerian dalam membasmi kes denggi yang semakin meningkat dengan mengenakan tindakan terhadap individu atau pihak yang menyebabkan kes denggi berlaku seperti di tapak projek pembinaan dan kawasan perumahan.
21. PR-1331-L67396  
**Tuan Liew Chin Tong [ Kluang ]** minta **PERDANA MENTERI** menyatakan bentuk kerjasama dan fungsi antara Bahagian Staf Perisikan Pertahanan, Cawangan Khas, Majlis Keselamatan Negara, Bahagian Penyelidikan Jabatan Perdana Menteri dalam menangani ancaman keselamatan dalam negeri mengikut kategori keganasan, ketenteraman awam dan politik.
22. PR-1331-L65885  
**Dato' Haji Irmohizam bin Haji Ibrahim [ Kuala Selangor ]** minta **MENTERI KESIHATAN** menyatakan sejauh manakah Kementerian mempunyai peruntukan undang-undang untuk mengambil tindakan tegas sekiranya menerima aduan berhubung lokasi pembiakan nyamuk aedes yang menyebabkan kadar kematian akibat demam denggi yang meningkat.
23. PR-1331-L66661  
**Tuan Loke Siew Fook [ Seremban ]** minta **MENTERI DALAM NEGERI** menyatakan status terperinci kes pembunuhan di bawah Kanun Keseksaan 302 yang melibatkan 2 mangsa iaitu Koh Poi Lim (KP: 501123-05-5219) dan Yee Ah Kiw (KP: 530329-05-5380) dan berapakah suspek yang telah didakwa.
24. PR-1331-L65403  
**Datuk Linda Tsen Thau Lin [ Batu Sapi ]** minta **MENTERI PENGANGKUTAN** menyatakan usaha bagaimana untuk meningkatkan rangkaian landasan kereta api bagi menghubungkan bandar-bandar utama di Sabah.
25. PR-1331-L66423  
**Raja Dato' Kamarul Bahrin Shah [ Kuala Terengganu ]** minta **MENTERI PENGANGKUTAN** menyatakan apakah rumusan sebab-sebab utama Kementerian atas kenaikan begitu tinggi kos KLIA 2 daripada kos asalnya.

26. PR-1331-L67383  
**Datuk Joseph Salang anak Gandum [ Julau ]** minta **PERDANA MENTERI** menyatakan tahap perbincangan antara Kerajaan Negeri Sarawak dengan Kerajaan Pusat berkenaan permintaan Negeri Sarawak bagi menaikkan agihan pendapatan Petronas dari minyak dan gas kepada negeri pengeluar.
27. PR-1331-L67230  
**Tuan Haji Nasrudin bin Hassan [ Temerloh ]** minta **MENTERI KEWANGAN** menyatakan jumlah lesen perjudian yang telah dikeluarkan sejak tahun 2010 hingga 2014.
28. PR-1331-L65535  
**Tuan Nogeh anak Gumbek [ Mas Gading ]** minta **MENTERI KEWANGAN** menyatakan sejauh manakah kesiapsiagaan rakyat Malaysia dalam menghadapi pelaksanaan GST yang akan datang serta apakah usaha yang akan diambil bagi memastikan para peniaga akur untuk menetapkan harga yang berpatutan berikutan penghapusan cukai berganda.
29. PR-1331-L66751  
**Tuan Chua Tian Chang @ Tian Chua [ Batu ]** minta **MENTERI DALAM NEGERI** menyatakan mengapa tiada waran tangkap atau sekatan imigrasi (*restriction of Travel*) terhadap Koperal Sirul Azhar Umar sehingga beliau dapat melepaskan diri. Apakah rancangan Kerajaan untuk membawa balik Sirul untuk hukuman dijalankan memandangkan Kerajaan Australia tidak membenarkan banduan dihantar pulang.
30. PR-1331-L67416  
**Dato' Sri Azalina binti Dato' Othman Said [ Pengerang ]** minta **MENTERI KESIHATAN** menyatakan apakah faktor Malaysia kini menjadi antara kilang terbesar 'mengeksport' jururawat ke serata dunia dan apakah langkah Kementerian untuk membawa balik atau untuk mengurangkan kadar penghijrahan ini yang akan membawa kesan yang buruk kepada sektor kesihatan jika masalah tersebut tidak ditangani.
31. PR-1331-L66188  
**Tuan Oscar Ling Chai Yew [ Sibü ]** minta **PERDANA MENTERI** menyatakan adakah Kerajaan sedar proses persempadanan baru di Sarawak sudah bercanggah dengan peraturan-peraturan yang ditentukan dalam Perlembagaan Persekutuan. Adakah persempadanan baru ini mengikut cadangan daripada Jawatankuasa Pilihan Khas Parlimen untuk Penambahbaikan Proses Pilihan Raya Malaysia.
32. PR-1331-L67197  
**Puan Kasthuriraani a/p Patto [ Batu Kawan ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan langkah-langkah pencegahan penjualan dan pengambilan samsu haram memandangkan impaknya yang serius terhadap masyarakat terutama sekali dari etnik India.

33. PR-1331-L66983  
**Tuan Gooi Hsiao-Leung [ Alor Setar ]** minta **MENTERI DALAM NEGERI** menyatakan status siasatan polis terhadap Mashitah Ibrahim dan ucapannya semasa perhimpunan agung UMNO bulan November lalu yang mendakwa orang Cina Kedah membakar kitab Quran di Kedah.
34. PR-1331-L65920  
**Puan Alice Lau Kiong Yieng [ Lanang ]** minta **MENTERI PERTAHANAN** menyatakan:-
- (a) sejauh manakah keberkesanan Program Latihan Khidmat Negara (PLKN) dan apakah impak kepada negara apabila diumumkan akan ditangguhkan pada tahun 2015; dan
  - (b) sama ada PLKN akan dijalankan semula selepas 2015 dan jumlah kos yang dapat dijimatkan memandangkan kos ke atas operator, jurulatih dan pegawai akan dibayar juga.
35. PR-1331-L65843  
**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI TENAGA, TEKNOLOGI HIJAU DAN AIR** menyatakan apakah usaha-usaha Kementerian yang terkini dalam industri "*sustainable energy*" dan apakah perancangan untuk negara dalam jangka masa panjang, supaya rakyat jelata mendapat kesan dan nikmat daripada usaha Kerajaan.
36. PR-1331-L66303  
**Tuan Wong Sze Phin @ Jimmy [ Kota Kinabalu ]** minta **MENTERI KEWANGAN** menyatakan anggaran GST yang akan dikutip daripada sumbangan negeri Sabah dan memberi perbandingan anggaran tersebut dengan negeri-negeri yang lain. Dan adakah Kerajaan berniat meningkatkan syarat penyertaan GST bagi sesebuah syarikat daripada keuntungan setahun RM500,000 ke RM1 juta atau RM2 juta memandangkan beban peniaga yang berat.
37. PR-1331-L66026  
**Tuan Anyi Ngau [ Baram ]** minta **MENTERI KOMUNIKASI DAN MULTIMEDIA** menyatakan capaian internet jalur lebar di kawasan Baram serta adakah pihak Kementerian akan mendirikan lebih banyak menara telekomunikasi di Baram untuk tahun 2015.
38. PR-1331-L66710  
**Puan Hajah Fuziah binti Salleh [ Kuantan ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan mekanisme penyelarasan dan penurunan harga barang yang diguna pakai pihak Kementerian sesuai dengan turun naiknya harga minyak petrol.
39. PR-1331-L66000  
**Datuk Nur Jazlan bin Mohamed [ Pulai ]** minta **PERDANA MENTERI** menyatakan peruntukan yang diterima oleh Majlis Keselamatan Negara (MKN) setiap tahun bagi mengatasi masalah bencana di negara ini.

40. PR-1331-L67302  
**Dato' Haji Mahfuz bin Omar [ Pokok Sena ]** minta **MENTERI PENGANGKUTAN** menyatakan berapakah jumlah bayaran pampasan yang dibayar oleh Kerajaan kepada 2 syarikat iaitu Beta Tegap Sdn. Bhd. dan Automated Traffic Enforcement System (ATES) Sdn. Bhd. yang mengendalikan sistem penguatkuasaan automatik (AES) dalam proses pengambilalihan pelaksanaan sistem tersebut.
41. PR-1331-L66336  
**Dr. Tan Seng Giaw [ Kepong ]** minta **MENTERI DALAM NEGERI** menyatakan bilangan syarikat keselamatan swasta, syarat yang dikenakan dan bilangan pengawal terlatih dan tidak terlatih dalam negara ini.
42. PR-1331-L66897  
**Dr. Mohd Hatta bin Md. Ramli [ Kuala Krai ]** minta **MENTERI PENDIDIKAN** menyatakan statistik berhubung tindakan tatatertib dan jenis hukuman yang dikenakan ke atas kakitangan awam di universiti awam semenjak tahun 2000 sehingga 2014.
43. PR-1331-L66906  
**Tuan Abdullah Sani bin Abdul Hamid [ Kuala Langat ]** minta **MENTERI DALAM NEGERI** menyatakan berapakah jumlah syarikat yang dikenakan tindakan kerana mengambil PATI sebagai pekerja mereka.
44. PR-1331-L67220  
**Dato' Dr. Mujahid Yusof Rawa [ Parit Buntar ]** minta **MENTERI WILAYAH PERSEKUTUAN** menyatakan apakah usaha yang dibuat untuk mewujudkan zon hijau dalam kerancangan pembangunan di Kuala Lumpur dan sekitarnya.
45. PR-1331-L65804  
**Dr. Noor Azmi bin Ghazali [ Bagan Serai ]** minta **MENTERI KESIHATAN** menyatakan:-
- (a) jumlah doktor pakar onkologi setakat tahun 2014 dan apakah nisbah yang terkini bagi doktor pakar ini terhadap pesakit; dan
  - (b) apakah rancangan mahupun pelan yang dirangka oleh Kementerian dalam menambah pakar onkologi berikutan dengan penambahan pesakit kanser mencecah 37,000 kes baru saban tahun.
46. PR-1331-L67368  
**Datuk Mas Ermieyati binti Samsudin [ Masjid Tanah ]** minta **MENTERI TENAGA, TEKNOLOGI HIJAU DAN AIR** menyatakan:-
- (a) anggaran perbelanjaan yang diperlukan oleh pihak Kerajaan untuk melaksanakan pelan induk kecukupan tenaga nasional dalam tempoh 10 tahun; dan

- (b) anggaran penjimatan kos dan bil elektrik, subsidi gas dan arang batu dan pembinaan loji-loji jana kuasa baru yang dapat dielakkan berdasarkan hasil dan dapatan kajian-kajian yang telah dijalankan oleh perunding-perunding pakar yang telah dilantik oleh kementerian sepanjang tahun 2009-2010.

47. PR-1331-L67174

**Puan Hajah Normala binti Abdul Samad [ Pasir Gudang ]** minta **MENTERI SUMBER MANUSIA** menyatakan hasil kajian yang dijalankan berhubung dengan penguatkuasaan gaji minimum dan adakah pihak Kementerian berhasrat untuk menjalankan kajian lanjut berkenaan gaji minimum berdasarkan pada kriteria berikut:-

- (a) gaji minimum untuk pekerja tempatan seharusnya lebih tinggi daripada pekerja asing berikutan kos hidup pekerja tempatan adalah lebih tinggi kerana perlu menampung bayaran rumah, kenderaan, utiliti dan sebagainya; dan
- (b) gaji minimum seharusnya berbeza untuk pekerja yang telah lama berkhidmat dengan pekerja yang baru sahaja mula bekerja dan gaji minimum dikelaskan mengikut jenis industri atau saiz perniagaan yang dijalankan.

48. PR-1331-L66230

**Puan Teresa Kok Suh Sim [ Seputeh ]** minta **MENTERI KEWANGAN** menyatakan cara pengiraan harga RON95 dan RON97 dan kenapakah terdapat perbezaan 20 sen dalam harga RON95 dan RON97 pada 1 Disember 2014. Apakah cukai jualan sebanyak 58 sen per liter telah pun dimasukkan dalam harga jualan RON95 selepas Kerajaan memperkenalkan harga petrol mengikut sistem apungan.

49. PR-1331-L66537

**Tuan Tony Pua Kiam Wee [ Petaling Jaya Utara ]** minta **MENTERI KEWANGAN** menyatakan kedudukan Abu Dhabi Malaysia Investment Corporation, syarikat pelaburan usaha sama antara 1MDB Global Investment Limited dengan Aabar Investments PJS. Apakah kedudukan pinjaman US\$3 bilion untuk tujuan di atas dan di mana wang ini dilaburkan.

50. PR-1331-L65407

**Tuan Haji Mohd Fasiah bin Haji Mohd Fakeh [ Sabak Bernam ]** minta **MENTERI PERTANIAN DAN INDUSTRI ASAS TANI** menyatakan bilangan ladang ternakan lembu yang terbiar seluruh negara dan apakah langkah Kementerian bagi memulihkan ladang ternakan lembu terbiar ini bagi meningkatkan pengeluaran daging lembu dan kerbau negara ini yang kini bekalan daging lembu dan kerbau 70 peratus diimport serta apakah langkah Kementerian bagi melonjakkan peningkatan pengeluaran daging negara sehingga memenuhi sekurang-kurangnya 50 peratus pada tahun 2020.



51. PR-1331-L67175  
**Datuk Ikmal Hisham bin Abdul Aziz [ Tanah Merah ]** minta **MENTERI KOMUNIKASI DAN MULTIMEDIA** menyatakan adakah Kerajaan bercadang untuk memperkenalkan garis panduan khusus yang lebih ketat bagi artis-artis dari luar negara agar mereka lebih prihatin terhadap sensitiviti agama dan budaya rakyat Malaysia.
52. PR-1331-L65489  
**Dato' Takiyuddin bin Hassan [ Kota Bharu ]** minta **MENTERI KEWANGAN** menyatakan:-
- (a) sejauh manakah Regim Pencegahan Pengubahan Wang Haram/Pembanterasan Pembiayaan Keganasan (AML/CFT) berjaya membendung aktiviti pengubahan wang haram (*money laundering*) di negara ini; dan
  - (b) berapakah jumlah kes pengubahan wang haram yang telah dibawa ke mahkamah dan berapa pula yang telah diselesaikan.
53. PR-1331-L67270  
**Dr. Hajah Siti Mariah binti Mahmud [ Kota Raja ]** minta **MENTERI KESIHATAN** menyatakan jumlah dan peratus doktor pelatih (*houseman*) yang tidak menamatkan latihan mereka 5 tahun kebelakangan ini dan apakah sebab-sebab di sebalik kegagalan mereka menamatkan latihan.
54. PR-1331-L65942  
**Dato' Dr. Nik Mazlan bin Nik Mohamad [ Pasir Puteh ]** minta **MENTERI PENGANGKUTAN** menyatakan bilakah Kerajaan dapat membaiki kerosakan jalan kereta api disebabkan banjir yang melanda. Berapa anggaran kos pemulihan yang diperlukan untuk memulihkan perkhidmatan kereta api di Pantai Timur.
55. PR-1331-L66159  
**Datuk Wira Haji Ahmad bin Hamzah [ Jasin ]** minta **MENTERI KEWANGAN** menyatakan apakah usaha-usaha yang sedang diambil untuk mengukuhkan lagi kemampuan agensi-agensi tertentu mengumpul "*economy/Market Intelligence*" serta membuat ramalan, unjuran dan "*forecasting*" yang lebih tepat agar kesilapan/kelemahan seperti dalam menyediakan Bajet 2015 dapat dielakkan serta tindakan pro-aktif yang jitu dapat dirangka lebih awal lagi.
56. PR-1331-L66959  
**Tuan Wong Ling Biu [ Sarikei ]** minta **MENTERI KEWANGAN** menyatakan dengan terperinci berkenaan dengan kedudukan kewangan Kerajaan pusat pada masa sekarang. Adakah kedudukan kewangan negara sekarang masih stabil untuk mengelakkan daripada berkorupsi.
57. PR-1331-L65627  
**Datuk Sapawi bin Ahmad Wasali [ Sipitang ]** minta **MENTERI SUMBER MANUSIA** menyatakan jumlah majikan sudah dikenakan tindakan undang-undang setakat ini akibat kegagalan mematuhi peraturan berkaitan gaji minimum kepada pekerja mereka. Jika tindakan kompaun diambil, berapa jumlah kutipan diperolehi.

58. PR-1331-L66804  
**Tuan Chong Chieng Jen [ Bandar Kuching ]** minta **PERDANA MENTERI** menyatakan setakat mana prinsip *Borneanisation* telah diamalkan dalam bidang perkhidmatan awam. Apakah statistik berkenaannya.
59. PR-1331-L66484  
**Tuan Sim Tze Tzin [ Bayan Baru ]** minta **MENTERI PELANCONGAN DAN KEBUDAYAAN** menyatakan kejayaan Visit Malaysia Year 2014 (VMY). Berapakah pelancong, mengikut negara, yang melawat Malaysia 2014, dan jumlah perbelanjaan mereka.
60. PR-1331-L66063  
**Tuan Ng Wei Aik [ Tanjong ]** minta **MENTERI DALAM NEGERI** menyatakan bilangan repot polis yang dibuat, siasatan polis yang dijalankan serta tindakan selanjutnya yang diambil bagi kes jenayah dan bukan jenayah yang diadukan terhadap setiap Menteri Kabinet dan Timbalan Menteri sejak pelantikan mereka selepas Pilihan Raya Umum ke-13.
61. PR-1331-L66263  
**Dato' Mohd Ariff Sabri bin Abdul Aziz [ Raub ]** minta **MENTERI DALAM NEGERI** menyatakan:-
- (a) apakah langkah-langkah yang diambil setakat ini untuk membawa Koperal Sirul Azhar kembali ke Malaysia ; dan
  - (b) apakah langkah-langkah penjagaan yang akan diambil oleh Kerajaan bagi mencegah tokoh-tokoh yang mempunyai kes "high profile" seperti Sirul daripada melarikan diri.
62. PR-1331-L66836  
**Dato' Abd. Aziz bin Haji Sheikh Fadzir [ Kulim Bandar Baharu ]** minta **MENTERI KEWANGAN** menyatakan tindakan Kerajaan terhadap isu yang mengatakan bahawa terdapat usaha yang cuba sabotaj ekonomi negara dan bagaimanakah perkara ini boleh berlaku.
63. PR-1331-L67077  
**Dato' Hasbullah bin Osman [ Gerik ]** minta **MENTERI PENDIDIKAN** menyatakan status dan perkembangan Sekolah Agama Bantuan Kerajaan. Sejauh manakah peruntukan yang diluluskan melalui PRK telah dibelanjakan dan impaknya pada sekolah-sekolah berkenaan.
64. PR-1331-L66570  
**Dr. Ong Kian Ming [ Serdang ]** minta **MENTERI TENAGA, TEKNOLOGI HIJAU DAN AIR** menyatakan sama ada *Project 3B* untuk membina loji tenaga yang telah diberikan kepada 1MDB akan diberikan kepada Tenaga Nasional Berhad memandangkan ketidakupayaan 1MDB untuk mendapatkan pembiayaan untuk projek ini.
65. PR-1331-L66446  
**Tuan William Leong Jee Keen [ Selayang ]** minta **MENTERI KEWANGAN** menyatakan sebab-sebab bagi pengurangan dalam rizab luar negeri dan sama ada Kerajaan akan mempertimbangkan untuk mengenakan semula kawalan mata wang kerana nilai ringgit yang semakin lemah.

66. PR-1331-L66966  
**Tuan Er Teck Hwa [ Bakri ]** minta **MENTERI PERTANIAN DAN INDUSTRI ASAS TANI** menyatakan bilangan pengusaha burung walit yang melanggar SOP Kementerian telah disiasat, dihukum dan dibebaskan oleh penguat kuasa setiap tahun daripada 2010 hingga 2014.
67. PR-1331-L66857  
**Tuan Teo Kok Seong [ Rasah ]** minta **MENTERI PENDIDIKAN** menyatakan secara terperinci mengenai usaha Kerajaan untuk mengembalikan kebebasan akademik dan autonomi pelajar di semua Institusi Pengajian Tinggi Awam.
68. PR-1331-L66084  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI BELIA DAN SUKAN** menyatakan berapakah jumlah belia yang mendaftar sebagai pemilih dan layak mengundi dalam sesi pemilihan calon Parlimen Belia yang dilaksanakan baru-baru ini dan berapakah jumlah yang keluar mengundi.
69. PR-1331-L65440  
**Tuan Hee Loy Sian [ Petaling Jaya Selatan ]** minta **MENTERI KERJA RAYA** menyatakan pemansuhan Lebuhraya KIDEX selepas laporan konsultan bebas yang dilantik oleh MBPJ mendapati Lebuhraya KIDEX tidak disyorkan.
70. PR-1331-L66097  
**Dato' Dr. Tan Kee Kwong [ Wangsa Maju ]** minta **MENTERI DALAM NEGERI** menyatakan adakah wujudnya kaitan antara Pertubuhan Pribumi Perkasa dengan Kerajaan. Adakah Kerajaan menaja pertubuhan NGO ini.
71. PR-1331-L66924  
**Dato' Ir. Haji Nawawi bin Ahmad [ Langkawi ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan melihat kepada penurunan harga minyak dunia dan memberi impak kepada pengurangan kos pengangkutan barangan, apakah tindakan Kerajaan untuk memastikan pengimport, pengeluar, pengedar dan peniaga dapat mengurangkan kos barangan mereka kepada rakyat.
72. PR-1331-L67249  
**Tuan Julian Tan Kok Ping [ Stampin ]** minta **MENTERI DALAM NEGERI** menyatakan keberkesanan "*biometric system*" di sepanjang sempadan Sarawak-Kalimantan terutamanya dalam menghalang kemasukan warga Indonesia yang bakal mengancam kesejahteraan serta keselamatan rakyat Sarawak.
73. PR-1331-L65564  
**Tuan Fong Kui Lun [ Bukit Bintang ]** minta **PERDANA MENTERI** menyatakan tindakan Kerajaan ke atas gesaan Menteri Pertanian dan Industri Asas Tani supaya memboikot kenaikan harga barangan oleh pemborong dan peruncit yang dilihat sebagai isu perkauman.

74. PR-1331-L67213  
**Tan Sri Datuk Seri Panglima Annuar bin Musa [ Ketereh ]** minta **MENTERI BELIA DAN SUKAN** menyatakan adakah Kementerian berpuas hati dengan kerja-kerja penambahbaikan Stadium Nasional Bukit Jalil dan apakah punca stadium terbabit dikatakan tidak begitu sesuai digunakan untuk perlawanan bola sepak antarabangsa.
75. PR-1331-L65768  
**Datuk Bung Moktar bin Radin [ Kinabatangan ]** minta **MENTERI KEMAJUAN LUAR BANDAR DAN WILAYAH** menyatakan tentang apakah langkah-langkah dan komitmen Kementerian untuk terus membawa agenda pembangunan luar bandar dan merapatkan jurang pembangunan antara bandar dan luar bandar, terutamanya di Sabah dan Sarawak.

**ATURAN URUSAN MESYUARAT DAN USUL-USUL**

1. **Usul dibuat oleh Yang Berhormat Datuk Seri Noh bin Haji Omar [ Tanjong Karang ]** dan masalah dicadangkan :-

“ Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Ketiga, Parlimen Yang Ketiga Belas.”

**Menyambung semula Perbahasan atas masalah (18 Mac, 2015)**

- |    |                |  |                               |
|----|----------------|--|-------------------------------|
| 2. | (D.R. 24/2014) | Rang Undang-undang Dadah Berbahaya (Pindaan) (No.2) 2014<br><br><b>[ Menteri Kesihatan]</b>              | <b>Bacaan Kali Yang Kedua</b> |
| 3. | (D.R. 29/2014) | Rang Undang-undang Pendidikan (Pindaan) 2014<br><br><b>[ Menteri Pendidikan ]</b>                        | “                             |
| 4. | (D.R. 26/2014) | Rang Undang-undang Perhubungan Perusahaan (Pindaan) 2014<br><br><b>[ Menteri Sumber Manusia ]</b>        | “                             |
| 5. | (D.R. 30/2014) | Rang Undang-undang Teknologis dan Juruteknik 2014<br><br><b>[ Menteri Sains, Teknologi dan Inovasi ]</b> | “                             |
| 6. | (D.R. 23/2014) | Rang Undang-undang Ahli Parlimen (Saraan) (Pindaan) 2014<br><br><b>[ Perdana Menteri ]</b>               | “                             |

**7. Menteri Kewangan akan mencadangkan :-**

"Bahawa Dewan ini, mengikut peruntukan perenggan 4(b) Akta Pendanaan Kerajaan 1983 [Akta 275], mengambil ketetapan supaya Kerajaan memindahkan sebanyak RM39.592 bilion wang terimaan Terbitan Pelaburan Kerajaan (TPK) yang diterima di bawah seksyen 3(1) Akta yang sama ke Kumpulan Wang Pembangunan yang dinyatakan dalam Jadual Kedua Akta Tatacara Kewangan 1957 [Akta 61] bagi maksud Kumpulan Wang tersebut."

**8. PR-1331-U65762**

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, agama Islam adalah agama rasmi negara ini, namun kebebasan beragama di negara ini terjamin seperti yang termaktub dalam Perlembagaan Persekutuan. Dan mengambil maklum juga, isu agama adalah merupakan isu sensitif terutama sekali dalam negara yang berbilang kaum dan agama. Dan mengambil maklum juga bahawa, penukaran agama bagi mereka yang di bawah umur memerlukan persetujuan daripada ibu bapa mereka terlebih dahulu sebelum mereka menukar agama. Dalam kes penukaran agama anak perempuan (berumur 16 tahun) Encik Jilius Yapoo yang berlaku di Sekolah Menengah Kinarut dengan tanpa persetujuan ibu bapa kanak-kanak ini telah mengundang spekulasi dan andaian yang tidak sihat terutama sekali kepada perpaduan kaum dan agama di negara ini. Insiden ini sedikit sebanyak telah menghakis dan melunturkan kepercayaan rakyat (terutama sekali yang bukan beragama Islam) terhadap institusi sekolah sebagai pusat ilmu dan juga kepada sistem perundangan negara, di mana kebebasan beragama adalah terjamin seperti yang termaktub dalam Perlembagaan Persekutuan. Maka, bagi menangani masalah ini, Dewan yang mulia ini hendaklah mengambil ketetapan bahawa, mana-mana pihak yang cuba untuk menukar agama mereka yang di bawah umur atau mana-mana individu yang di bawah umur hendak menukar agama mereka, pihak tersebut hendaklah mendapatkan persetujuan bertulis lebih awal daripada ibu bapa individu tersebut. "

**[ Perdana Menteri ]**

**9. PR-1331-U65853**

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum, terdapat rungutan-rungutan di kalangan rakyat negeri Sabah dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau diendahkan. Dan mengambil maklum juga, antara isu utama yang disuarakan dalam rungutan ini adalah kebanjiran pendatang asing ke negeri Sabah dan ditambah buruk pula dengan pemberian status warga negara kepada mereka ini. Dan mengambil maklum juga bahawa, setiap kali isu 20 perkara dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai ke satu tahap di mana mereka secara terbuka

menggelarkan diri mereka sebagai aktivis Sabah Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan undang-undang semata-mata untuk menghalang mereka bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan lagi keadaan di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak prihatin dan kuku besi. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara holistik termasuklah menjemput dan mendengar rungutan mereka ini."

**[ Menteri Dalam Negeri ]**

10. PR-1331-U65760

**Tuan M. Kulasegaran [ Ipoh Barat ]** akan mencadangkan:-

"Bahawa Dewan Rakyat ini mengambil maklum bahawa banjir telah melanda di beberapa negeri baru-baru ini, di mana harta benda rakyat telah dimusnahkan dan banyak nyawa telah terkorban. Dalam keadaan ini, Dewan ini mengarah Perdana Menteri supaya mengambil strategi jangka masa panjang untuk mengatasi masalah ini dengan segera."

**[ Perdana Menteri ]**

11. PR-1331-U66345

**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan banjir besar di negara."

**[ Perdana Menteri ]**

12. PR-1331-U66346

**Dr. Tan Seng Giaw [ Kepong ]** akan mencadangkan:-

"Bahawa Dewan ini mendebatkan gerakan militan di Malaysia."

**[ Menteri Dalam Negeri ]**

13. PR-1331-U67135

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis Diraja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

**[ Menteri Dalam Negeri ]**

14. PR-1331-U67141

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

**[ Menteri Pendidikan ]**



**RISALAT-RISALAT YANG DIBAWA KE DALAM MESYUARAT**  
**(DEWAN RAKYAT)**

<b><u>TAHUN</u></b> <b><u>2015</u></b>	<b><u>RISALAT/DOKUMEN</u></b>	<b><u>TARIKH</u></b> <b><u>DIBENTANGKAN</u></b>
CMD.4	Laporan Tahunan Suruhanjaya Pasukan Polis Bagi Tahun 2013	19 Mac 2015
ST. 13	Laporan Tahunan dan Penyata Kewangan Universiti Putra Malaysia (UPM) Bagi Tahun 2013	19 Mac 2015
ST. 19	Laporan Tahunan dan Penyata Kewangan Universiti Pertahanan Nasional Malaysia (UPNM) Bagi Tahun 2013	19 Mac 2015